

Espectaculo Local

Cas di Cultura cu "A Musical Night"




ORANJESTAD (AAN) - Cas di Cultura tin e honor di por presenta 'A Musical Night' dia 1 di juli, un anochi di concierto cu hitsnan grandi den e generonan musical y popular. E anochi lo wordo treci door di artistanan masha multifacetico, e top di e mundo di musical di Hulanda, esta sra. Marisca van Kolck, sr. Stanley Burleson y sra. Vera Mann. Invitadonan di e show

orguyosamente lo ta Aruba su propio talentonan Alydia Wever y Edjean Semeleer. Marisca van Kolck a gradua na e prestigioso Nel Roos Academie unda e'la specialisa den teatro. Sinembargo e'la cosecha exito tanto na television den e rol di presentadora como riba tarima den produccionnan musical grandi. Dos biaha Mariska a keda nomina como

mihor rol principal femenino den un musical y dos biaha e'la bai cu e premio. Esaki tabata pa e musicals 'Oliver' y '42nd Street'. Tambe e'la ricibi premio pa su rolnan den e musicalnan 'Ciske de Rat - de Musical' y pa e rol di Roxi den 'Chicago'.

Vera Mann a debuta den 'My Fair Lady' na 1987 y tabata e prome 'Evita' di Hulanda den e produccion grandi di het Koninklijk Ballet van Vlaanderen. Ademas di e rol magno ey e'la hunga rolnan den 'Les Miserables', 'West Side Story', 'Diana', 'Sweeney Todd' y 'Mamma Mia!' entre otro.

Stanley Burleson ta un 'triple threat', pues ta canta, baila y actua fabulosamente. E ta coreografo y director tambe pa television pero principalmente pa shownan musical. E mes a hunga rolnan principal den 'Cats', 'Miss Saigon', 'Chicago', 'La Cage Aux Folles' y 'Sister Act'. Pa cantante Karin Bloemen semper e ta haci e coreografia di su shownan y ultimamente a gana e premio principal pa mihor coreografia pa e musical



'Joseph and the Amazing Technicolor Dreamcoat'.

Aparte di duna les di baile na Scol di Baile Diana Antonette



Alydia Wever a studia na Boston Conservatory y na Alvin Ailey Dance Theater.

e ta creadora di conceptionan artistico di cual a sali entre otro su obranan 'One In Soul' y 'Muhe Frida'. Alydia ta e prome ganadora di festival di canto 'Love & Peace' (1993) cual a luci Alydia su talento vocal. Alydia tambe tabata director artistico pa varios show y coreografa di baile di obra musical 'Trevia e Garado di Djaka'.

Edjean Semeleer a cuminsa como 'child star' di Aruba den e ramo di cantamento. For di chiquito su talento tabata ovio. E ta canta cu pasion, cual ta resona den su stem caluroso y su carisma riba escenario. Aparte di a cosecha exito cu su shownan di 'Hey ta Pasco' e'la gana varios premio den festivalnan di canto y tambe ta presentador na television.

No perde e oportunidad di disfruta y conoce un tiki mas di e genero di musicals, treci pa artistanan fantastico. 'A Musical Night' lo ta un anochi ameno y agradabel y un berdadero 'treat' prome cu vakantie di scol cuminsa. Carchi ta obtenibel na Cas di Cultura.

